

水
西
會
條

查
鐸
著

中
華
書
局

水西會條

此據涇川叢書本
排印初編各叢書
僅有此本

水西會條

明 毅齋查 鐸著

孟子云。人之所以異於禽獸者幾希。庶民去之。君子存之。幾希者。言此心之靈。只這些子。然人與禽獸之分。實係於此。故能存之。則此心之靈。常爲之主。所以參三才而靈萬物者。以此不能存之。則中無所主。而恣情縱欲。尙氣鬪狠。無所不爲。名雖爲人。實違禽獸不遠矣。今語人以禽獸。未有不忿然怒者。乃在於幾希之存不存。噫。可畏哉。故學也者。所以存此幾希。學矣而有會也者。正求與朋友合併講明此幾希而求存之也。此會之不可已也。然會以証此學。非必會而後學也。未會之先。用功何如。則於會中商之。既會之後。新得何如。則於會中啟之。不徒泛泛浮論。徒長知見。庶乎會可以久而學可以成也。不然。每年之會。止於四季。每季之會。止於五日。未會以先。既會以後。俱無所事事。雖會亦何益哉。承諸兄之言。開示數條。相爲勉之。

一、立真志。天下事未有無志而能成者。雖小小曲藝且然。況欲了性命大事。以爲聖人。豈可不立真志。志亦不可空立。此心之靈。雖只幾希。然至微而顯。至近而神。發之於視聽言動之間。皆有自然之天理。庶民以欲蔽之。故不知存。惟聖人無欲。故此心純乎天理。吾人欲爲聖人。必存此天理。真知此理。乃吾人安身立命之處。如此則生。不如此則死。如此則爲人。不如此則爲禽獸。惟存此理以求自慊其心。如饑者之於食。求飽而已。寒者之於衣。求溫而已。不爲門面。不顧非笑。不以紛華動念。不以他技亂心。時時刻刻。惟知

有此而不復知有他。是之謂立真志。

一用實功。今之學者。或於靜中收斂稍久。見有光景。或於師友言下解悟。偶有知見。遂自信自是。以爲道在是矣。不知總是虛見。聖人致知格物之學。不離見在實事。若當下錯過。縱說禪說定。說元說妙。何益。故論修己不外一敬。論待人不外一恕。論行有不得不外一反己。此皆從身心性情上理會。須以此心之靈爲主。時時著察。精神必斂。意氣必平。舉動必端。取與必慎。懲忿窒欲。無縱情以自肆。遷善改過。無長傲以遂非。無好爭是非。無背言過失。常使一敬流通。毫髮不敢自肆。真有終日對越上帝之心。此方是見在實功。方是入微路逕。若議論雖是。意見雖高。至其舉動不免與俗人一樣。此只是作僞。畢竟何益。

一銷舊習。既立真志。又用實功。則於學問宜有得矣。然而人情易流。舊習難銷。夫以言餽之。以不言餽之。此皆人情相安而不覺者。孟子至比之穿窬。況吾人以半生習染。若驕心妬心貪心吝心忿心欲心能心機心種種諸念。已與性成。向因相安而不自覺。今既知反求此心。凡此諸病。自不能掩。其初動處。卽責此志不能長進。務期決去。真如履薄冰而恐陷也。如臨深淵而恐墜也。戰戰兢兢。不敢少留於中。不使少走出路。庶幾舊習潛消。真心漸復。於道不遠矣。

一求益友。古人以朋友列之五倫。蓋友所以輔仁。念庵云。父母生我身。朋友成我仁。此心如不仁。形神皆非真。蓋真知友義之重者。自學問不明。世徒以勢交利合。始不知友義之重。苟爲性命之心誠切。則於朋友真如魚之於水。一刻亦不可離。故凡朋友合併。當虛心謙己。以相下相求。見人之善。若己有之。見人之

不善若己犯之相規以過而必相感以誠相勸以義而必相觸以幾在言者固當忠告善道在聽者惟恐不直不盡苟議論未合不妨從容開導無執己見以好勝無驕浮詞以遂非無而斥人過以爲直無過譽人善以長諛一念眞誠眞有出於言語形迹之外者則彼此受益而會可久矣

水西書院之初建也士儀張先生榮實首其事一時名儒如鄒東廓守錢緒山、洪王龍溪、畿皆王文成高足弟子迭主講席而水西之學名天下江陵柄國惡講學撤天下書院水西鞠爲茂草矣江陵既敗震川翟先生毅齋查先生合而復之而力以闡發文成之旨爲己任俾水西之學有所歸一則毅齋之功獨多此水西會條乃書院復後之所作也其會歲以四季季以五日先生既歿其門弟子繼之猶數十年延及崇禎之季兵荒游臻而講會漸輟矣今雖春秋二祀尙具簞羊之意而庸流雜還言不及義有志者所不屑與也往訓猶在而盛事莫追是可慨夫嘉慶四年十一月後學趙紹祖識